



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

Symbolum LXX. Vlysses Circæ triveneficæ incantamenta solvit.

[urn:nbn:de:hbz:466:1-68709](#)

ton c 10. Talis C. Caligula, cuius votum erat, unam ut cervicem populus Romanus haberet, quam unico iictu dejicere posset. Talis Phocas Orientalis Imperii invasor, cui in animo erat omnes ē medio tollere, in quibus nobilitatis, aut gloria, aut prudentia indicium esset. *Nicēph.* lib. 18. c. 55. anno Ch. 602. Talis *Ezelinus*, barbaro potius quam Italico solo dignus Tyrannus, qui XII. millia civium Patorum ad unum omnes uno compulso loco necari jussit. *Iovius*. Talis Wenceslaus Imp. & Bohemiæ rex, cui perpetuus comes carnifex & suppliciorum minister; quo tam familiariter utebatur, ut etiam filium ipsius de S. fonte levārit. *Dubrau.* lib. 23. Taceo Phalarides, Busrides, Diomedes, Mezentios & mille alios. Quibus omnibus crudelitatis monstris non defuit suus *Vlysses*, qui ultionem sumpsit, & ingurgitatem cruoris humani tabem revomere coēgit.

S Y M B O L U M L X X .

Vlysses Circæ triveneficæ incantamenta solvit.

14. *Metamorph.*

Ethicè.

1. Mutatio hominis in bestiam. 2. Illecebræ voluptatis malæ.

Circe, Solis & Perseidis Nymphæ filia, Ætæ, Colchorum regis soror, beneficiorum peritissima; Sarmatarum rege, cui nuperat, veneno sublato, regnoque per scelus parto, cum crudelius imparet, ab incolis pulsa, in Italiam profugit, & in Circæ monte sedem sibi delegit, *Scyllam* puellam in monstrum marinum transmutavit: *Picum*, Latinorum regem in avem sui nominis, alios in alias bestiarum formas vertit. Regiam inhabitabat splendidam, & medio in luce sitam, locum, omnibus delitiis affluentem. In primo limine hospitibus occurrebant variae belluae, sed cicuratæ, lupi, ursi, leones, canum instar eos adulantes. Post hos sece ferebant obviam, & adventores per atria marmore strata deducebant rara venustate Nymphæ; donec ad interiora veniretur. Ibi in conclavi ornatissimo, sublimis in throno, in aurea veste, & palla fulgida sedebat benefica, ad omnem humanitatem composita. In cuius ubi conspectum hospites venere, mox ipsa prior salutare,

salutare, frontem in lætitiam diffundere, & ad votorum audaciam invitare. Simul in humanitatis ac benevolentiae tesseram, in aureo poculo *mulsus* propinare.

Quod ubi hauserunt advenæ, singulorum verticem magica virga leniter contingebat. Et ecce subitam Metamorphosin! mox enim setis horrescere cœpere comites Vlyssis, in portorum figuræ abire, grunnire, harāmque petere. Elapsus est unus, cui nomen *Eurilochus*, qui subodoratus maleficium, respuit poculum, de clade sociorum certiore fecit Vlyssem. Hic cum herba *moly* in amuletum à Mercurio jam antè accepta, ad Circen contendit; porrigentem medicatum scyphum, conantemque caput ejus virgâ illâ portentificâ permulcere, stricto gladio repellit; nec antè minari ac terrere desistit, quâm ipsa maleficium solvet, & socios in pristinam formam, statumque restituerit.

Ethica.

I. (a) Decantata est hæc fabula, & nota malæ voluptatis imago, quæ blanditiis velut delinimento quodam dementare mortales, & in bestias transformare solet. Hæc, ut Dio Chrysostomus loquitur, non gladiis, non hastis, non bipennibus, neque sagittis homines impugnat: sed luxu, deliciis, epulis, illecebris, mollitie inescat, decipit, effeminat, liquefacit, enervat.

(b) Innuit etiam fabula, eos mortalium in bestias verti, qui nequaquam ratione ducuntur: sed totos se dedunt turpibus affectibus, nihilque hominis præter nomen habentes, in pecudum naturam degenerant: puta libidine in ursos, spurciâ in sues, ferociâ in leones, voracitate in lupos &c. Quid autem Vlysses, qui neque venenatum poculum ori admovit, neque à monstrifica virga se tangi passus est, nisi firmum illum & constantem sapientis habitum significat, qui neque frangi terroribus, neque blanditiis, aut pravorum affectuum illiciis ab honesto potest abduci?

II. (c) Agnosce voluptatis vêtitæ irritamenta. Primum est *Forma*. Nam Circe amabili quodam fulgore radios è vultu vibrabat, & intuentes in amorem trahebat; quam ob causam *solis filia* dicta est. Sapientis monitum est Proverb. 6. *Non concupiscat pulchritudinem ejus cor tuum, nec capiaris nutibus illius.* *Hebraice*, palpebris volantibus & vibrantibus, sicut sol vibrat radios, & nubes fulgura. Iynx avicula, quæ

Fff à collis

(a) *Mutatio hominis in bestiam.* (b) *Vitia mutant hominem in bestiam.*

(c) *Illecebra voluptatis prava.*

à colli versura *vertilla* & *torquilla* dicitur, intuentes in suū amorem rapere fertur, & quasi dementare. Teste Pierio Hierogl. lib. 25. c. 51. Prima castitatis labes ex oculis ducitur. Alterum invitamentum libidinis in ædibus Circes, *Cantus* fuit, de quo Maro. 7. Æneid.

Dives in accessos ubi solis filia lucos

Affiduo resonat cantu.

Sunt enim post oculorum illecebras (quas meretricius veneficæ & ancillarum ornatus ac aspectus accedit, proximus ad flagitium gradus, lascivæ cantilenæ.

Tertium irritamentum, suaves *odores*. Pergit Virgilius:

----- tectisque superbis

Vrit odoratam nocturna in lumina cedrum.

Etiam per nares Venus subit, & in suavissimis unguentis *Camerina* fœtentis Cupidinis latet. Juxta epigrammatarium.

----- Non bene olet, qui bene semper olet. lib. 2.

Quartò accedit his illiciis *otium*. Ovidius de Ostiariis Circæ Nymphis.

----- quæ vellera motis

Nulla trahunt digitis, nec fila sequentia ducunt.

Quintò quid dicam de tectis superbis, de mensis, de lectis, de rebus omnibus ad decipiendum dispositis? Et quid aliud quam Circen, seu noxiā & lascivam voluptatem repræsentat, illa apud Regium paramiographum mulier garrula & vaga, ornata meretricio preparata ad capiendas animas. Audi quibus lenociniis insidias paret. Nam apprehensum (sunt verba Salomonis Proverb. 7.) deosculatur juvenem, & pro socii vultu blanditur dicens: *Intexui funibus lectulum meum* (id est, ut mollius cubes fasciis & institis subtentis lectulum suspendi) *stravat apetibus platis ex Ægypto* (id est, picturatis, & ad oculos pascendos ad tactum recreandum factis) *aspersi cubile meum myrrha, & aloë, & cynamomo*. Quid aliud egit Circe? ut Vlyssem caperet, blandum arietem omnibus ejus sensibus admovit: Quid porrò Salomon de lena voluptate? *Veni inebriemur uberibus, fruamur cupiditis amplexibus; donec illucescat dies*. Hic prodit se impudentia prostibuli, & palam cupiditatem obscoenam solvit. Ita miseros decipit voluptas, & ex hominibus efficit bestias. Experti sunt Vlyssis socii. Quid, quod Vlysses ipse, quamvis initio generose restiterit, tandem incensus sit. Nam si Homero credimus, veneficæ amoribus irriteritus, annumque integrum in illa Circes

la Circes regia versatus , denique filium suscepit , Telegonum nomine ; qui, quod fieri solet , parenti non tantum probro & decori , sed etiam exitio fuit. Quid enim ex vipera , nisi venenatus partus nasceretur ? Cave quisquis es , *Calicem aureum meretricis Babyloniae*. Jerem. 51. veneficium pro beneficio porrigit. Soporiferum Circes poculum non absimile videtur illi assassinorum paradiso , de quo Paulus Venetus lib. 1. c. 28. Orient. histor. In Persidis regno tyrannus quidam , Alaodinus dictus , Muletam regionem occupavit , multosque scarios , quos dixerat Assassinos hoc astu sibi adjunxit. In valle quadam amoenissima , & præruptis cincta montibus paradisum omni deliciarum genere , quamvis Mahometes promittebat , instruxit. In eum locum , oblata soporiferâ potionē , dormientes deferendos curabat. Experrecti , cùm omnibus deliciis affatim fruerentur , revera se in paradyso fuisse credebant. At præstigator ille , capta opportunitate , medicato poculo sopitos , rursus extra paradisum efferebat , eos , ad omnia , quæ imperabat , patranda paratis simos postea habiturus. Quid aliud facit voluptas ? quæ hominem ubi semel falsis deliciarum illecebris captum extra se posuit , & in cœlo quodam imaginario collocavit , deinceps ad abiectissima quæque mancipium habet.

S Y M B O L U M L X X I .

Vlysses Sirenum cantus spernit.

Homerus Odyss. lib. μ

Ethicè.

Blanda Libido etiam heroës sternit.

SIrenum fabulam jam alibi exposuimus ; hic satis erit apponere laudes , quas Venusinus Vates de Vlysse canit epist. 2. lib. 1.

Rursus quid virtus & quid sapientia possit ,

Utile proposuit nobis exemplar Vlyssem :

Qui domitor Troiae , multorum providus urbes ,
Et mores hominum inspexit : latumque per æquor
Dum sibi , dum sociis redditum parat , aspera multa
Pertulit , adversis rerum immersabilis undis .
Sirenum voces , & Circæ pocula nosti :

Fff 2

Quæ